

Na osnovu člana 19. stav 1. Zakona o Vladi Federacije Bosne i Hercegovine ("Službene novine Federacije BiH", broj 1/94, 8/95, 58/02, 19/03, 2/06 i 8/06 ) i člana 7. stav 4. Zakona o privatizaciji preduzeća ("Službene novine Federacije BiH", broj 27/97, 8/99, 32/00, 45/00, 54/00, 61/01, 27/02, 33/02, 28/04, 44/04 i 42/06), Vlada Federacije Bosne i Hercegovine donijela je

**UREDBU  
O POSTUPKU PRIPREME I PODJELE PREDUZEĆA NA  
TEHNOEKONOMSKE CJELINE U SVRHU PRIVATIZACIJE**

**I. OPĆE ODREDBE**

**Član 1.**

Ovom Uredbom uređuju se nadležnost, način i postupak pripreme plana podjele, pripreme programa privatizacije i početnih bilansa preduzeća za koja je utvrđeno da je privatizacija uslovljena prethodnom podjelom preduzeća na samostalne tehnoeekonomske cjeline (u daljnjem tekstu: tehnoeekonomske cjeline), te postupak prodaje tehnoekonomskih cjelina.

**II. PRIPREMA PREDUZEĆA ZA PODJELU NA TEHNOEKONOMSKE CJELINE**

**Član 2.**

Preduzeće će se privatizirati uz prethodnu podjelu na tehnoeekonomske cjeline ukoliko nije iskazan interes kupaca za kupovinu preduzeća u cjelini i kada je podjela preduzeća na održive tehnoeekonomske cjeline, moguća.

Podjela preduzeća na tehnoeekonomske cjeline ne može se vršiti ako preduzeće, kao cjelina, ima veće obaveze od vrijednosti imovine.

**Član 3.**

Inicijativu za podjelu preduzeća na tehnoeekonomske cjeline u svrhu privatizacije može pokrenuti uprava preduzeća, nadležna agencija za privatizaciju i nadležno ministarstvo koje vrši ovlašćenja i obaveze vlasnika kapitala po osnovu državnog kapitala u tom preduzeću (u daljnjem tekstu: nadležno ministarstvo).

**Član 4.**

Na osnovu inicijative iz člana 3. ove Uredbe odluku o pokretanju postupka podjele preduzeća na tehnoeekonomske cjeline u svrhu privatizacije donosi nadzorni odbor preduzeća.

Odluka iz stava 1. ovog člana sadrži osnovne razloge za pokretanje postupka podjele preduzeća, kriterije za podjelu i definisane tehnoeekonomske cjeline.

Odluka iz stava 1. ovog člana, radi blagovremenog upoznavanja povjerenika, objavljuje se najmanje u jednom dnevnom listu koji je dostupan na području Federacije Bosne i Hercegovine.

#### **Član 5.**

Nadzorni odbor preduzeća na osnovu odluke iz člana 4 stav 1. ove Uredbe, imenuje komisiju za izradu prijedloga plana podjele preduzeća na tehnoekonomske cjeline u svrhu privatizacije (u daljnjem tekstu: Komisije).

Komisija iz stava 1. ovog člana sastoji se od najmanje pet članova u kojoj moraju biti zastupljene osobe potrebnih struka.

Komisiju iz stava 1. ovog člana čine predstavnici:

- preduzeća
- nadležnog ministarstva
- nadležne agencije
- sindikata preduzeća.

Pored članova komisije iz stava 3. ovog člana, u cilju pružanja stručne pomoći u izradi prijedloga plana podjele preduzeća mogu se, po potrebi, angažovati spoljni saradnici određenih struka (konsultantske i revizorske kuće, vještaci i drugi), o čemu odluku donosi nadzorni odbor.

#### **Član 6.**

Uprava i nadzorni odbor preduzeća, dužni su komisiji obezbijediti revidirane finansijske izvještaje za obračunski period koji je prethodio odluci o pokretanju postupka podjele, te pružiti sve podatke u vezi poslovanja i finansijskog stanja preduzeća, kao i ostale relevantne podatke koji su neophodni za izradu prijedloga plana podjele preduzeća na tehnoekonomske cjeline.

Tokom svoga rada u pripremi, te izradi prijedloga plana podjele preduzeća, komisija je obavezna saradivati sa nadležnom agencijom i nadležnim ministarstvom.

#### **Član 7.**

Nadzorni odbor utvrđuje prijedlog plana podjele preduzeća na tehnoekonomske cjeline i dostavlja nadležnoj agenciji za privatizaciju.

#### **Član 8.**

Prijedlog plana iz člana 7. ove Uredbe nadležna agencija za privatizaciju, putem nadležnog ministarstva, dostavlja nadležnoj vladi radi davanja saglasnosti i donošenja odluke o utvrđivanju metoda privatizacije.

#### **Član 9.**

Skupština preduzeća uz saglasnost iz člana 8. ove Uredbe donosi odluku o usvajanju plana podjele na tehnoekonomske cjeline.

Tehnoekonomske cjeline iz stava 1. ovog člana nemaju svojstvo pravnog lica i nastavljaju poslovati u sastavu preduzeća do njihove prodaje.

#### **Član 10.**

Nadležna agencija za privatizaciju, u svrhu privatizacije, a radi blagovremenog upoznavanja potencijalnih kupaca, obavještenje o odluci iz člana 8. ove Uredbe objavljuje u najmanje jednom dnevnom listu koji je dostupan na području Federacije Bosne i Hercegovine.

Obavještenje iz stava 1. ovog člana treba da sadrži osnovne naznake planirane podjele preduzeća na tehnoekonomske cjeline.

### **III. PLAN PODJELE PREDUZEĆA NA TEHNOEKONOMSKE CJELINE**

#### **Član 11.**

Plan podjele preduzeća obavezno sadrži:

1. osnovne podatke o preduzeću kao cjelini;
2. osnovne razloge za podjelu preduzeća na tehnokonomske cjeline u svrhu privatizacije sa utvrđivanjem tehnokonomskih cjelina koje nastaju podjelom preduzeća;
3. osnovne podatke o tehnokonomskim cjelinama;
4. raspodjelu imovine i obaveza preduzeća po tehnokonomskim cjelinama;
5. imovinu preduzeća koja nije u sastavu ni jedne tehnokonomske cjeline;
6. raspored zaposlenika po tehnokonomskim cjelinama sa prijedlogom rješavanja eventualnog viška zaposlenih;
7. vlasnička prava u preduzeću koje se dijeli i u tehnokonomskim cjelinama koje nastaju podjelom.

Predložena raspodjela iz tačke 4. i 6. ovog člana treba da obezbijedi dovoljnu konkurentnost tehnokonomskih cjelina.

Planom podjele svaka tehnokonomska cjelina treba da bude obrazložena posebno sa organizacionog, ekonomskog, tehnološkog, razvojnog, tržišnog, kadrovskog i infrastrukturnog aspekta.

### **IV. IZRADA PROGRAMA PRIVATIZACIJE I POČETNIH BILANSA STANJA SAMOSTALNIH TEHNOEKONOMSKIH CJELINA**

#### **Član 12.**

Elementi usvojenog plana podjele iz člana 11. ove Uredbe su obavezni okvir za pripremu programa privatizacije i početnih bilansa stanja tehnokonomskih cjelina.

#### **Član 13.**

Preduzeće priprema programe privatizacije i početne bilanse stanja tehnokonomskih cjelina i dostavlja ih nadležnoj agenciji na odobravanje.

#### **Član 14.**

Programi privatizacije i početni bilansi tehnokononomskih cjelina se pripremaju po odredbama Zakona o početnom bilansu preduzeća i banaka ("Službene novine Federacije BiH", br. 12/98, 40/99 i 47/06) i podzakonskih akata donesenih na osnovu ovog Zakona.

#### **Član 15.**

Preduzeće će poslovanje tehnokonomskih cjelina računovodstveno odvojeno evidentirati po odobravanju programa privatizacije i početnog bilansa stanja istih.

### **V. PRODAJA TEHNOEKONOMSKIH CJELINA**

#### **Član 16.**

Prodaja tehnokonomskih cjelina preduzeća vrši se po odredbama Zakona o privatizaciji preduzeća i podzakonskih akata donesenih na osnovu ovog Zakona koji uređuju postupak

velike privatizacije.

#### **Član 17.**

Imovina preduzeća iz člana 11. tačka 5. ove Uredbe predstavljaju zajedničku imovinu svih dijelova preduzeća.

Privatizacija imovine iz stava 1. ovog člana vrši se po odredbama Zakona o privatizaciji preduzeća i podzakonskih akata donesenih na osnovu ovog Zakona koji uređuje postupak male privatizacije i obavlja se najkasnije prije okončanja privatizacije posljednje tehnoekonomske cjeline preduzeća.

Sredstva ostvarena privatizacijom imovine iz ovog člana, koriste se u skladu sa planom koji definiše nadzorni odbor preduzeća po prioritetima u skladu sa zakonom.

#### **Član 18.**

Preduzeće je dužno da u sudskom registru izvrši promjene koje su nastale prodajom tehnoekonomskih cjelina, a koje se odnose na djelatnost i organizaciju preduzeća.

#### **Član 19.**

Skupština preduzeća donosi odluku o isknjižavanju knjigovodstvene vrijednosti tehnoekonomske cjeline na teret osnovnog kapitala preduzeća nakon izdavanja rješenja nadležne agencije o odobravanju upisa izvršene privatizacije u sudski registar te tehnoekonomske cjeline.

#### **Član 20.**

Ukoliko je preduzeće organizovano kao dioničko društvo, privremeno se obustavlja promet dionicama preduzeća u periodu od dana izvršnosti odluke o prodaji tehnoekonomske cjeline do dana upisa kod Registra vrijednosnih papira, o čemu Registar obavještava nadležna agencija.

#### **Član 21.**

Ovlašćuje se Agencija za privatizaciju u Federaciji Bosne i Hercegovine da može donositi provedbeni akt za primjenu ove Uredbe.

#### **Član 22.**

Ova Uredba stupa na snagu narednog dana od dana objavljivanja u "Službenim novinama Federacije BiH".